

Segun ASOMA:

Claudius Philips ta debidamente reconoci na Aruba

ORANJESTAD (AAN)- Relaciona cu e articulo den DIARIO di 13 di Februari, presidente di ASOMA a reacciona bisando cu nan ta di opinion cu Claudius Philips tin un reconocimiento total na Aruba, pa locual ta trata e pueblo Arubano. E fanaticada su tras semper ta back e up.

Segun ASOMA disonan di Claudius ta worde bon bendi, su casettenan tambe ta worde bon cumpra. E tin un trabao fiho como 'entertainer Talk of the Town, y el a worde reconoci pa gobierno di Aruba, gobierno di Antillas, Claudius a ricibi e premionan Mo Tito y Rufo Wever den varios ocasion vota pa miembronan di prensa

Arubano.

Tambe cu Claudius tabata na New York cu un supuesto beca di gobierno insular cu intermediacion di sr. Joy Kock y cu bon ayudo den e tempo ey di diputado Remy Zaandam, pero e beca a worde kita gracias na "onderwijszaken" cu no a reconoce e school na New York.

Actualmente Claudius tin un beca disponible, despues cu Sr. Joy Kock atrobe a intermedia mandando cartanan cu peticion pa gobierno di Aruba, gobernador di Aruba, Arubahuis na Hulanda, Sticusa y Unoca na Aruba. Sticusa a reacciona y a recomenda pa pidi Unoca e ayudo. Normalmente Unoca no ta yuda cu beca pero a haci un

excepcion y Claudius tin un beca actualmente pa un aña pa Berklee.

Mayoria di e musiconan sobresali a studia na Berkley cu beca di gobierno pero strafo cu e ta zona onderwijszaken no ta reconoce Berkley tampoco. Hildward Croes tambe ta un ex-alumno y graduado di Berkley y awe Aruba ta orguyoso cu Hildward a yuda cu un disco a worde nomina pa Grammy Award esun mas halto na mundo di premiacion y e school cu el a bay nota worde reconoci. Strafo no?

Pues Claudius tin su beca den su mannan y ta na su persona ki dia e lo bay Boston. Claudius mester a bay for di aña pasa Sep-

tember pero segun su version e tabata tin problemanan familiar. E mester a bay principio di Januari pero atrobe problemanan fuera di su alcanze. Si Claudius sigui tarda e ta perde su beca cu ta algo cu ASOMA lo lamenta hopi.

Aki na Aruba Claudius a logra tur locual cu por worde logra. EL a yega lo maximo. Su next step mester ta subi e pantaya internacional y pesey e mester studia. Talento ta conta masha poco, e studio ta locual ta principal awendia.

Tocante di gana auto of hopi placa durante contest segun ASOMA cu tin premio pa tur

finalista di calypso contest, roadmarch contest y tumba contest cu ta suma na Miles y Miles di Florin no solamente pa cantantenan pero tambe pa compositornan, areglistanan etc.

Apesar cu Claudius a gana e aña aki Fl.1400,- como rey di Calypso y roadmarch, tambe el a gana 600 Florin mas como compositor plus un pasashi ida y vuelta pa Hulanda plus estadia paga.

Claudius ta un gran cantante y compositor y musico y ASOMA su aprecio pe ta maximal. Di ASOMA su banda semper a yude desinteresadamente y ta desea di mire bira internacional.